

& interrumpetur, tituli & dominia disjungerentur, transferrenturque in aliam lineam & ditionem. De Hassonia quidem scriptum inueni, quod olim fuerit comitatus subiectus Landgrauio Thuringensi, sed postea & ipsa surrexit in Landgrauiatum. Anno Christi 1241. defecit linea Landgrauiorum Thuringensium sub Friderico secundo, translatumque est dominium ad Marchiones Misniae. Nam Alberti marchionis Misniae mater fuerat filia Landgrauij Thuringensis. Deinde anno Christi 1423. cum elector dux Saxoniae sine prole moreretur, imperator Sigismundus dedit ducatum illum dominis Misnensibus, & ab eo tempore triplicem habuerunt titulum, nam sunt Landgrauij Thuringenses, Marchiones Misnenses & duces Saxoniae. Circa annum Christi 1120, praefuit Thuringiae Ludouicus Langrauius gener Lotharij imperatoris & ducis Saxoniae, cui successit Ludouicus filius eius, & huic quoque successit filius Ludouicus, qui anno Christi 1182. sine prole in terra sancta obiit, successitque ei frater eius Hermannus, cuius filius Ludouicus duxit uxorem Elisabetham regis Vngariae filiam, suscepitque ex ea filiam nomine Sophiam, quam duxit Brabantiae dux, & filium Hermannum, qui cum sine prole moreretur anno 1241. Sophia soror conabatur filium suum Ludouicum ducem Brabantiae in fratris substituere locum, at Misnenses reuertes praefecerunt Landgrauiatui Albertum Henrici Marchionis sui filium. Tunc Sophiae alter filius nepe Henricus dux Brabantiae, factus est Landgrauius Hassoniae. Quae sequuntur suppeditauit Io. Dryander Hasso, uir ob insignem eruditionem doctis quibusque notus. Henricus dux Brabantiae & Landgrauius Hassoniae genuit Ottonem successorem: Otto duos habuit filios, Hericum qui ei successit sed prolem non reliquit, & Ludouicum, cuius filius Hermannus patruo successit. Hermannus filius Ludouicus successit, Ludouicus habuit quatuor filios, Ludouicum successorem, Henricum qui ducta ultimi comitis de Catzenelnbogen filia, socero in comitatu successit, Hermannum, qui factus est archiepiscopus Coloniensis, Fridericum qui puer obiit. Ludouicus duos habuit filios, & uterque uocatus fuit Guilielmus, prior senior, alter medius: habuit & Hericus filium nomine Guilielmum, & hic iunior appellatus fuit. Senior Guilielmus patri successit, quo praematura morte sublato, procurante archiepiscopo Coloniensi, Guilielmus iunior principatui praeficitur atque comitatibus Catzenelnbogen, Dietz & Nidda, duxitque uxorem filiam comitis Palatini, at cum ipse quoque in iuuentutis flore moreretur, tota ditio ad Guilielmum medium peruenit. Et hic tempore belli Bauarici genuit Philippum, qui iam praesidet principatui.